

bi sebi učinio. Nije ljubav uvijek ono što se njenim imenom naziva. Zlo koje čini jedan čovjek drugome, čini i samom sebi i to se na kraju tako i potvrdi i završi. Oprosti svom neprijatelju da bi živio u miru sa sobom i s njim. Vidi, čovječe, koji hodaš malen ispod zvijezda, što vas povezuje, a ne što vas razdvaja. Lakše ćete zajedno istim putem. U svim vjerama propovijeda se mir i dobro, ljubav i oprost. No, svjesni smo da se u ime vjere i ljubavi čine loše stvari sebi i drugima. Ne možemo spriječiti zlo, ali ga možemo nadvladati čineći puno dobra. Razgovarajmo jedni s drugima o dobrim stvarima među nama.

Kad čitamo Muhamedove izreke (Hadisi) koji je Allahov poslanik, posebno zadivljuje sljedeća poruka (234): *Rad čovjeka koji je izišao iz svoje kuće žureći da zaradi i nahrani svoju malu djecu, u ime je Allaha, a on sam je na Allahovom putu. Ako je krenuo da radi htijući da nahrani i izdržava svoje stare i iznemogle roditelje, i u tom slučaju je na Allahovom putu. Ako je pak požurio da zaradi radi sebe, da ne bi bio ovisan od drugih, i tada je na Allahovom putu. Ali, ako je krenuo da zarađuje iz licemjernih pobuda, iz gordosti prema drugima, u tom slučaju on je na putu šejtana.*

Nova vremena donijela su nove mogućnosti, ali nova iskušenja i prilike kojima je teško odolijevati. Osobe izrasle iz tradicionalnih vrijednosti, jednako vrijednih u svim vremenima koja su prošla i koja tek dolaze, teško mogu skrenuti. Velika skretanja zahtijevaju promjene u svakom pogledu kako u obitelji, lokalnim zajednicama tako i u društvu općenito.

Klanjamo li se zlatnom teletu danas kad se klanjamo virtualnom svijetu i bit coinu zaboravljajući prave vrijednosti stvarnog svijeta i stvarnih osjećaja jednih prema drugima, skrećemo s pravoga puta.

Ipak se čini kako ima nade za nas ako započnemo strpljivo razgovarati o dobrim stvarima među nama da bi se upoznali, razumjeli, poštovali, i stvarali zajedničke putove u budućnost naše zajednice.

* * * * *

MEDIJSKA REPREZENTACIJA IZGRADNJE ISLAMSKOG CENTRA U RIJECI: OD SLUČAJA DO ZNAČAJA

Goran Goldberger

Zagreb, Hrvatska

Prezentacija (Medijska reprezentacija izgradnje Islamskog centra u Rijeci: od slučaja do značaja) uključuje sociološku perspektivu i teorijski i metodološki okvir istraživanja: trostruki osvrt na položaj muslimana i islama i gradnju džamija, koji su pod utjecajem povijesnog i suvremenog društvenog konteksta Europe i Hrvatske, te na predmet, cilj i metodologiju istraživanja (analiza diskursa priloga dnevnih novina i portala od 1996. do 2013. i medijskog načina praćenja ove konkretne aktivnosti i prikaza njezinog razvoja). Slijede rezultati, prezentacija nekih elemenata i zaključno razmatranje.

* * * * *

ISLAMSKA TRADICIJA BOŠNJAKA KAO ŠTIT OD EKSTREMNIH SEKTAŠKO-POLITIČKIH TUMAČENJA ISLAMA

Safvet Halilović

Univerzitet u Zenici, Islamski pedagoški fakultet, Zenica, B&H

Jedna od veoma bitnih specifičnosti islama je u činjenici da je riječ o učenju u kojem su spojeni znanost i religija, uspostavljena ravnoteža između duha i materije i nije razdvojen ovaj od budućeg svijeta. To je, zapravo, bitna odlika islama u odnosu na druge svjetonazore koji primarnu pažnju poklanjaju materijalnoj strani života, tjelesnim potrebama i ljudskim porivima, pridajući, putem iznalaženja mogućnosti što bržeg zadovoljenja potreba za užitkom, veću pažnju ovosvjetskom životu, ne nalazeći odgovarajuće mjesto za Boga i buduću svijet u svojoj filozofiji i svome misaonom i obrazovnom organiziranju. Islamska civilizacija zbližila je čovjeka s Bogom, povezala Zemlju s nebesima, ovaj svijet podčinila budućem, spojila duh i materiju, uspostavila ravnotežu između razuma i srca, te napravila spoj između nauke i vjerovanja - podigavši značaj moralnog uzdizanja na razinu značaja materijalnog uspona. Zahvaljujući tome, islam i njegovi sljedbenici dali su veliki doprinos razvoju svjetske civilizacije.